

# Is Nehuna He Surat Ni Epustul Pablo Ziyà Te Ki Timoteo

## Is Mehitenged te Nehuna he Surat he Para ki Timoteo

Utew meregen is terebahu te etew he edumala te iglisya. Mevegat is menge vaal he kinahanglan he ebeelan din. Iyan sikandin ebpenurù te menge etew he egketigum te ked-azap te Megbevayà wey iyan sikandin edsambag kandan. Kinahanglan daan he ebeelan din is kegiya wey kedsusi te zuma he ebpemenerebahu para zutun te iglisya.

Utew mahal si Timoteo ziyà te gehinawa ni Pablo ne mid-isip din heini he anak din. Tetelu he tuig is kedumdumaha ni Pablo ki Timoteo ziyà te mahabethabet he menge inged, ne hein nevansey en sikandin iyan sikandin impezumala te menge tumutuu ziyà te Ipisu.

Hein malù en netegtegaad si Timoteo ziyà te Ipisu mibpesuratan sikandin ni Pablo te kedasig wey kedsambag kandin. Duen дума he menge etew zutun te Ipisu he ebpekesuway te tutuu is kandan he penurù. Ne kinahanglan he edsewayen sikandan. Duen kenà hustu is baal zan emun edtigum is menge tumutuu. Kinahanglan he ibpaahà kandan is hustu he paagi te kedsimba. Duen kandan mibegayan te ketenged te kebpengulu te zuma zan he menge tumutuu. Ne kinahanglan he zait sikandan he edtehuizen wey kenà sikandan selewayen. Midsembagan daan ni Pablo si Timoteo mehitenged te kedtavang te menge valu he vahi he egkengeregenan.

Mibpenurù din daan si Timoteo he hemeni zin is tutuu he ketudluan su para kenà mahal in te zuma wey kinahanglan daan he kenà sikandin egkeremerikan su para meupiya sikandin he petug-iringan he egkesunud te zuma.

**1** <sup>1,2</sup>Sikew, Timoteo he iring te tutuu he anak ku tenged te kedtuu nu ki Kristu, ebpesuratan ku sikew. Iyan a si Pablo he epustul ni Jesu Kristu, he ke vâ dà egkegiya, suluguen e zin. Nehimu a he epustul mehitenged te sugù te Megbevayà he iyan midlibri kenitew te

silit wey mehitenged te sugù ni Jesu Kristu. Iyan sikandin egkeserigan ta.

Berakat he ikegagew ka wey kehizuwi ka te Amey tew he Megbevayà wey te Nengazen tew he si Jesu Kristu wey vegayi ke zan te melinawen he kebpekesavuk.

### Is Kedewaya te Teruen he Menunudlù

<sup>3</sup>Ed-umanan ku egkegiya kenikew is sambag ku hein mid-awà a ziyan pehendiyà te Mesidunya. Iyan is: kenè ka med-awà diyan te Ipisu. Iyan idsembagi ku kenikew su zuen menge etew ziyan he kinahanglan he zewaya nu. Dewaya nu he med-engked dan te kebpenerù te menge sayep he tulluwen <sup>4</sup>wey med-engked dan te ked-istudyu te menge sayep he menge gugud, wey te menge melugayad he gugud te kepuun te menge etew. Su emun iyan heini ed-istudyuan dan ebpekidlewanè dan dà ke hengkey is hustu. Kenà egkehimu he pinaagi kayi egketueanan ta is ibpesavut te Megbevayà pinaagi te kedtuu. <sup>5</sup>Ne kinahanglan he iyan ketezengan ke maan is idsugù nu kandan heini su wey zan mahala is menge zuma zan diyà te gehinawa zan. Ne kenà egkehimu he hustu is kebmahala ta te menge zuma ta emun wazè ki melumpiyuwi te Megbevayà duen te menge salè ta. Kinahanglan he iyan dà ed-ul-ulahan ta is netueanan ta he hustu ne kinahanglan daan he tutuu is kedtuu ta te tutuu he tulluwen ne zutun human hustu is kebmahala ta te menge zuma ta. <sup>6</sup>Duen diyan menge etew he wazè dan mesegipà heini. Iyan dan impelavi is kebpekidlewanà mehitenged te wazè din pulus. <sup>7</sup>Su minsan pa te egkesuatan dan pezem he menge menunudlù sikandan te kesuguan he imbilinbilin ni Moises wazè dan hanew te egkegiyen dan wey wazè dan mesavut is tulluwen dan he idtegel zan diyà te zuma he menge etew.

<sup>8</sup>Netueanan ta he meupiya is kesuguan he imbilinbilin ni Moises ke hustu is kegemita ta kayi. <sup>9</sup>Iyan, wazà isugù heini su wey mezawey is menge metazeng he etew, kekenà, insugù heini su wey mezawey is menge mesinupaken, menge kenà metinumanen, menge kenà edtuu te Megbevayà, menge selaan, menge lalung wey menge kenà edtahud te Megbevayà, menge ebunù te amey wey iney zan, menge teremunù, <sup>10</sup>menge egkevut te kenè dan esawa, menge maama he egkeerigan te iring dan he maama, menge menggegebpa, menge teruen, menge eppen-ulug te kewsa wey is minsan hentei he ebpekesupak is ulaula zin te hustu he tulluwen. <sup>11</sup>Ne heini is hustu he tulluwen, ne ebpuun te Meupiya he Tudtulanen mehitenged te utew zekelà he gehem te Megbevayà. Is Megbevayà he iyan dait he edeligen, insarig din kedì heini is tudtulanen wey ku mesangyew.

### Is Gagew te Megbevayà

<sup>12</sup>Ebpeselematan ku is Nengazen tew he si Jesu Kristu su mibegayan e zin te zesen wey ku metuman heini is ebpeveelan din kedì. Mid-isip

e zin he metinumanen ne tenged kayi intezù e zin he suluguen din. <sup>13</sup>Dengan, mezaat is menge lalag ku mehitenged kandin; midrasey ku is menge sumusundan din ne midsumpalit ku sikandin. Ne minsan pa zutun, nehizuwan e zin su nehimu ku is menge mezaat he vaal ku tenged te wazè ku pa metueni is tutuu he tuluuwen wey wazè ku pa sikandin tuuwi. <sup>14</sup>Ne kenà dutun dà taman su utew ad ingkegagew te Megbevayà ne guntaan neketuu ad ki Jesu Kristu ne utew en sikandin mahal zini te gehinawa ku. <sup>15</sup>Duen erubasa he utew tutuu ne kinahanglan he tuuwi te minsan hentei; ne iyan is: “Midhendini si Jesu Kristu te kelibutan wey zin libriya te silut is menge mekesesalà.” Ne siak, iyan a tuwas he lalung te langun kandan. <sup>16</sup>Ne minsan pa zutun, nehizuwan a gihapun te Megbevayà su wey pinaagi te kebpelevaya zin kedì te utew lalung, ikepezayag ni Jesu Kristu he utew mepelevayen sikandin. Impezayag din heini su wey mesavut heini te langun he menge etew he edtuu kandin keuzemà ne ebegayan din te untung he wazà pidtemanan.

<sup>17</sup>Kes sebsevaha zà he Megbevayà, kenà egkeahà. Iyan sikandin hadi te minsan hengkey ne wazè din kemetayen; berakat he tehuza wey zeliga sikandin te wazè din pidtemanan.

<sup>18</sup>Ne sikew, Timoteo he anak ku, edteleenan ku sikew he ipenurù nu te menge etew heini is migkagi ku. Sungkad heini te netagnà dengan mehitenged kenikew. Ne idtelaan ku zaan he sumalà haazà is netagnà, pekezesen ka te kedsundaru nu tenged ki Jesu Kristu. <sup>19</sup>Iyan gumaan nu is kedtuu nu te tutuu he tuluuwen wey is kedtumana nu te langun he netuenan nu he hustu. Duen menge etew he wazè dan tumana is netuenan dan he hustu ne tenged kayi nezeetan en is kedtuu zan te Megbevayà. <sup>20</sup>Duma kayi si Himinyu wey si Alejandro. Impevayàbayè ku si Setanas kandan wey ikepenurù kandan he kenè dan sumpelita is Megbevayà.

### Is Kedsimba te Menge Tumutuu

**2** <sup>1</sup>Ne iyan idhuna ku idhangyù is: kinahanglan he vuyua te menge tumutuu is egkinehnglanan dan diyà te Megbevayà. Kinahanglan he iampù dan is langun he menge etew wey peselemati zan te Megbevayà is gagew zin kandan. <sup>2</sup>Iampù dan daan is menge hadi wey is minsan hentei he zuen din kegehèm su wey mebmelinew is ked-ubpè tew wey wazà samuk te kebpurungi tew kedtumana te egkesuatan te Megbevayà wey te hustu he ulaula. <sup>3</sup>Umba idhangyù ku heini su meupiya is ked-ampù he iring kayi. Iyan heini igkesuat te Megbevayà he Menluluwas tew <sup>4</sup>su iyan din egkesuatan is wey melibri te silut is tivuuk he menusiya ne wey zan daan metueni is tutuu he tuluuwen. <sup>5</sup>Sebsevaha zà is Megbevayà, ne sebsevaha zà daan is datù diyà te teliwazà te Megbevayà wey menge etew, ne iyan datù tew is etew he si Jesu Kristu. <sup>6</sup>Imbelavag

din is untung din ne mibpehimatey su wey zin mevelukasi is langun he menge etew. Ne pinaagi kayi, dutun te hustu he timpu, impeehè din he egkesuatan te Megbevayà he melibri te silut is tivuuk he menusiya. <sup>7</sup>Ne tenged kayi intezù e zin he epustul ne midsugù e zin wey ku ipenurù heini. Kenà tarù heini is egkegiyen ku, kekenà, tutuu. Midtezù e zin wey ku mepenurù is menge etew he kenà Hudiyu su wey zan meketuu te tutuu he tuluuwen.

<sup>8</sup>Ne tenged kayi, is menge maama ziyà te langun he menge inged he meheget is ked-engkezi zan te mezaat he ulaula, egkesuatan ku he med-ampù dan diyà te Megbevayà. Kinahanglan he wazà pauk dan te menge zuma zan wey wazè dan keduwazuwa. <sup>9</sup>Ne is menge vahi zaan, kinahanglan he hustu is kegemita zan te ugelingen dan. Kenè dan ipezalig, kekenà, kinahanglan he metau sikandan he egkeeled. Kenà utew subra is kebmekempeta zan te ulu zan pinaagi te vulvul zan. Kenè dan megamit te menge mahal iring te vulawan wey menge velieg he pirlas wey menge mahal he ugelingen, <sup>10</sup>kekenà, kinahanglan he iyan ideliga kandan is menge meupiya he ulaula. Iyan heini zait he ed-ul-ulahan te vahi he egkagi he ed-azap sikandin te Megbevayà. <sup>11</sup>Kinahanglan is menge vahi he mebpurung dan mebpemineg te penurù kandan he kenè dan megkagikagi wey kinahanglan he layun mebpezumazuma sikandan te menge egalen dan. <sup>12</sup>Kenè ku idtugut he iyan ebpenurù is bahi. Kenè ku zaan idtugut he ebayàbayà is bahi te maama. Mebpemineg dà sikandin, <sup>13</sup>su iyan nehuna he nelimbag si Adan ne human si Ibà. <sup>14</sup>Ne kenà iyan si Adan neekalan ni Setanas, kekenà, iyan si Ibà neekalan ne tenged dutun nekesupak sikandin te intelaan kandan. <sup>15</sup>Ne minsan pa te iyan haazà, egkelibri gihapun is menge vahi te silut pinaagi te ked-anak te vatà ke kenè dan edlekaan is kedtuu zan, wey is kebmahala zan te menge zuma zan wey is menge ulaula zan he igkesuat te Megbevayà wey is ked-erengana zan te langun he ed-ul-ulahan dan.

### Is Ed-uwit te Menge Tumutuu

**3** <sup>1</sup>Uteu tutuu is erubasa he edhenduen te: Is maama he egkesuat he iyan sikandin ed-uwit te menge tumutuu, utew meupiya haazà is terebahu he egkesuatan din. <sup>2</sup>Iyan, is ed-uwit te menge tumutuu, kinahanglan he wazà igkesewayi kandin. Sevaha zà is esawa zin ne kenè din selselai. Kinahanglan he egketengkaan layun is ed-ul-ulahan din; metau sikandin he ed-isip te hustu wey telehuzen sikandin. Kinahanglan he meelima sikandin te menge megeliyug din. Kinahanglan daan he metau he ebpenurù. <sup>3</sup>Kenà sikandin lelunguten; kenà sikandin ebpemegespeges, kekenà, metulanged sikandin. Edlikayan din is samuk ne kenà susuaten te selapì. <sup>4</sup>Kinahanglan he meupiya is ked-uwita zin te esawa zin wey menge anak din. Kinahanglan he menge mepeveyveyaan

wey metinehuzan layun is minge anak din kandin. <sup>5</sup>Su is maama he kenà metau he ed-uwit te esawa zin wey minge anak din, ebmenumenu sikandin he ed-uwit te minge etew he minge tumutuu te Megbevayà? <sup>6</sup>Ne kinahanglan daan he kenà sikandin begu pa he tumutuu, su kela ke mehimu he mepelevawen ne egkesilutan te Megbevayà iring te midsilutan si Setanas. <sup>7</sup>Kinahanglan he meupiya layun is minge ulaula zin su wey mehimu he telehuzen sikandin te minge etew he kenà tumutuu ki Kristu, su emun kenà, kela ke ituka zan ne egkeseleizan sikandin ni Setanas.

### Is Edtavang te Minge Tumutuu

<sup>8</sup>Ne iring din ded daan is minge diyekunu, *he ke và dà egkegiya, minge edtavang te minge tumutuu; kinahanglan he meupiya is minge ulaula zan. Kinahanglan he telehuzen sikandan; metinumanen sikandan te minge lalag dan. Kenè dan lelunguten, ne kenè dan mebmanggad pinaagi te limbung.* <sup>9</sup>Kinahanglan he edhemenan dan te edtuu he kenà duwazuwa is minge tuluuwen he imbugnà kenitew te Megbevayà. <sup>10</sup>Ke zuen etew he ebpilien niw he diyekunu, kinahanglan he edsusiyen pa is minge ulaula zin. Ne emun wazà netuenan he mezaat he ulaula zin, egkehimu he ebpilien sikandin he diyekunu. <sup>11</sup>Iring din ded daan is bahi he esawa te diyekunu su kinahanglan he telehuzen sikandin. Kenà minge vereituk, kekenà, egketengkaan is ked-isipa zin te langun wey egkengeserigan te minsan hengkey he meupiya he ulaula. <sup>12</sup>Is diyekunu, ne kinahanglan he sevaha zà is esawa zin ne kenè din selselai. Kinahanglan daan he meupiya is ked-uwita zin te esawa zin wey minge anak din <sup>13</sup>su is diyekunu he meupiya is minge vaal zin te kedtavang din te minge tumutuu, telehuzen sikandin utew te minge etew ne egkehimu he kenè din igkehandek is kebpenerù din mehitenged te kedtuu zin ki Jesu Kristu.

### Is Tutuu Mehitenged ki Jesu Kristu

<sup>14</sup>Kayi te kedsurat ku, ebperetengen ku he megaan e en ebpekepenumbaley ziyen te kenikew. <sup>15</sup>Umba ebpesuratan ku sikew su kela ke mesanggan a. Ne emun egkesanggan a egketuenan nu gihapun ke hengkey is hustu he ed-ul-ulahan he zait tew te minge anak te Megbevayà. Iyan kiw iglisya, *he ke và dà egkegiya, minge tumutuu te wazè din kemetayen he Megbevayà. Iyan kiw kes minge tukud wey vangeli he zutun mekesavuk is tutuu he tuluuwen.* <sup>16</sup>Ne netuenan tew te langun he lavew pa te langun is imbugnà he tuluuwen he midtuuwan tew.

Mibpeetew si Kristu;

midtistigusan te Wagas he Mulin-ulin he metazeng sikandin;

naahà sikandin te minge velinsuguen te Megbevayà;

insangyew sikandin diyà te minge etew he kenà minge Huidiyu;

duen minge tumutuu kandin dini te tivuuk he kelibutan;

midtulus sikandin pehendiyà te langit.

### Is Tarù he Ketudluanan

**4** <sup>1</sup>Utew keladu is impesavut te Wagas he Mulin-ulin he keuzemà te ketepusan he timpu zuen menge etew he kenè en edtuu te tutuu he tuluuwen, kekenà, iyan ebpeminegen dan is impinted te menge teruen he menge mulin-ulin. Ebpeminegen dan is impenurù kandan te menge mezaat he mulin-ulin <sup>2</sup>pinaagi te menge tarù te menge uvag kun tumutuu he kenè en ibmezaat te gehinawa zan is menge mezaat he ulaula zan. <sup>3</sup>Ibpenurù dan he indawey te Megbevayà is kebpengesawa ne egkegiyen dan he zuen menge egkeenen he indawey zaan. Iyan, heini is menge egkeenen, midlimbag te Megbevayà he egkeenen tew te menge tumutuu he nekesavut te tutuu he tuluuwen. Ne kinahanglan he ebpelemanan tew te Megbevayà emun egkeenen tew. <sup>4</sup>Meupiya is minsan hengkey he egkeenen he midlimbag te Megbevayà ne kinahanglan he kenè tew egkegiyen he mezaat is minsan hengkey, kekenà, edewaten tew wey ebpelemanan tew. <sup>5</sup>Netuenan ta he meupiya is kegkeena ta kayi tenged te iyan migkagi te Megbevayà wey tenged te ebpelemanan tew.

### Is Metinumanen he Suluguen

<sup>6</sup>Emun ibpenurù nu heini ziyà te menge zuma he tumutuu egkehimu ka he metinumanen he suluguen ni Jesu Kristu. Ne egkeheget is kedtuu nu pinaagi te ked-istudyu nu te tuluuwen tew wey pinaagi te kedhamen nu te hustu he impenurù kenikew. <sup>7</sup>Iyan, likayi nu is menge penurù he menge tarù he gugud he kenà dait te Megbevayà. Purungi nu tumana is egkesuatan te Megbevayà. <sup>8</sup>Duen deisek he pulus te kedlumbaza te lawa, iyan, utew zekelà is pulus te kedlumbaza te kedtuu ta su iyan ibmeupiya te kebpekesavuk tew minsan guntaan wey lavew en keuzemà ke ziyà ki en te langit. <sup>9</sup>Erubasa heini he utew tutuu ne kinahanglan he tuuwi te langun. <sup>10</sup>Tenged kayi ebpenigudu ki edhagù wey metuuwi heini te langun he menge etew su nekesarig ki en te wazè din kemetayen he Megbevayà ne iyan sikandin Menluluwas te langun he menge etew, lavew en is menge tumutuu kandin. <sup>11</sup>Heini is menge sugù ku wey penurù ku kenikew, isugù nu wey ipenurù nu zaan diyà te menge zuma nu.

<sup>12</sup>Minsan pa te menguhed ke pa, kinahanglan he mezait ka he edtehuzen te minsan hentei; kinahanglan he iyan ka ed-iringan te menge tumutuu ki Kristu, ne tenged kayi kinahanglan he tegtegami nu is kegkagikagi nu, is ulaula nu, is kebmahala nu te langun, is kedsarig nu te Megbevayà, wey is kedlikayi nu te meremerik he ulaula. <sup>13</sup>Taman te kenè e pa ebpekeuma ziyàn, iyan beeli nu is: besaha nu is Lalag te Megbevayà diyà te menge etew. Sembagi nu wey penurua nu sikandan.

<sup>14</sup>Kenè nu lipati haazà is ketau he imbegey zengan kenikew te Megbevayà pinaagi te kebpenuvadtuvad te ebpenueven wey pinaagi te kedempaa kenikew te minge ebmegurangan. <sup>15</sup>Hemeni nu wey purungi nu is kedtumana nu kayi te langun su wey metueni te langun is layun ked-iseg te kebpeketuman nu te egkesuatan te Megbevayà. <sup>16</sup>Purungi nu susiya is kenikew he ulaula wey is kebpenurù nu. Su emun edhemenan nu heini kenà iyan ke zà is egkelibri te silut, kekenà, pinaagi kenikew egkehimu he egkelibri zaan is minge etew he ebpememineg te ibpenurù nu.

### Is Ketengdanan te Minge Tumutuu

**5** <sup>1</sup>Kenè nu bensagi is megurang, kekenà, sembagi nu he iring te amey nu en. Sembagi nu zaan is minge menguhed he maama he iring te minge suled nu en. <sup>2</sup>Is minge vahi he megurang en, sembagi nu zaan he iring te iney nu en wey is minge menguhed he vahi, sembagi nu sikandan he iring te minge etevey nu en. Ne kinahanglan he utew hustu is ked-isipa nu kayi ziyà te kandan.

<sup>3</sup>Purungi niw is minge valu he vahi he wazè dan egkeserigan te keuyagan dan. <sup>4</sup>Ke zuen balu he vahi he zuen din minge anak wey minge apù, ipenurù nu kandan ke hengkey is ed-ul-ulahan dan wey zan metahud is ginikanan dan wey zan meverasi. Iyan heini egkesuatan te Megbevayà. <sup>5</sup>Ne sikan is balu he vahi he wazè din egkeserigan te keuyagan din, iyan din dà egkeserigan is Megbevayà, ne maandew wey mezukilem ed-ampù wey ebuyù te tavang diyà te Megbevayà. <sup>6</sup>Iyan, haazà is balu he vahi he iyan dà mulà egkesuatan din is minge kelibutanen he kelipey, minsan ke uuyag pa, iring sikandin te minatey en. <sup>7</sup>Heini is impenurù ku, ipurung nu isugù diyà te minge tumutuu ziyàn su wey wazà igkesewayi kandan. <sup>8</sup>Su ke zuen tumutuu he kenè din ed-elimahan is minge edsarig kandin, lavew en sikandan he ziyà ed-ubpà te valey zin, mid-engkezan din en is kedtumana zin te tuluuwen tew. Meupiya pa sikan is wazà meketuu kenà sikandin.

<sup>9</sup>Kenè niw ilista is balu he vahi he minus pa te keneman is penuigan din. Kinahanglan he wazè din selselai is esawa zin. <sup>10</sup>Ne kinahanglan daan he nevantug sikandin tenged te minge vaal zin he meupiya iring te ked-elimahi te minge vatà, ked-elimahi te minge megeliyug; nekelùlù sikandin te paa te minge tumutuu, midtavang sikandin te nengeseeng wey mibeelan din is minsan hengkey he minge meupiya.

<sup>11</sup>Kenè niw ilista is minge menguhed he minge valu he vahi su zuen timpu he pinaagi te suat te lawa zan, egkesuat dan pa he ebpeesawa ebpeuman. <sup>12</sup>Ne pinaagi zutun ebpekesalè dan su kenè dan edtumanen is pesarig dan ki Kristu. <sup>13</sup>Ne kenà duen dà taman su melemu zan ebpetetapul ne layun dan ebpenumbaley ziyà te minge valey, ne kenà iyan dà haazà su egkehimu zan daan he vereituk, ne ebpekekevut

dan te wazè dan kelavet duen ne ebenteenan dan is kenà meupiya he ebenteenan. <sup>14</sup>Ne tenged kayi egkesuatan ku he mebpeuman mebpeesawa is menge menguhed he valu he vahi su wey mekeanak sikandan ne med-elima te pemilya zan. Ne zutun wazà igkesewayi kandan te menge kuntada tew. <sup>15</sup>Umba egkegiyen ku heini su zuen menge valu he vahi he mid-engkezan dan is kedsunud dan ki Kristu ne ebpezumdumahan dan si Setanas. <sup>16</sup>Ke zuen tumutuu he vahi he zuen menge kegapi din he valu he vahi, kinahanglan he elimahi zin. Kenè din serigi is duma he tumutuu he iyan ed-elima su wey kenà mesemuki is menge tumutuu he ed-elima te zuma he menge valu he vahi he wazà egkeserigan.

<sup>17</sup>Is menge ebmegurangan he meupiya is ked-uwita zan te menge tumutuu, kinahanglan he isipa niw sikandan he zait he edtekepen is suhul kandan, lavew en sikandan is dekelà is baal zan te kedwali wey kebpenurù. <sup>18</sup>Iring sikandan te vaka he ibpegunas su zuen insurat he Lalag te Megbevayà he edhenduen te, “Is ibpegunas he vaka, kinahanglan he kenè niw ebusalan,” ne heini zaan, “Is etew he edterebahu, dait sikandin he edsuhulan.”

<sup>19</sup>Kenè niw peminega is edsumbang te ebmegurangan te menge tumutuu ke wazà dezuwa wey ke tetelu ve he ebpeketistigus te idsumbang. <sup>20</sup>Is ebmegurangan he layun ebpekesalà, sewaya nu ziyà te etuvangan te menge tumutuu su wey mahandek is menge zuma he ebmegurangan. <sup>21</sup>Edteleenan ku sikew he purungi nu tumana heini is insugù ku kenikew. Iyan ebpeketistigus kayi is Megbevayà, si Jesu Kristu, wey is menge pinilì din he velinsuguen. Kinahanglan he te minsan hengkey he ed-ul-ulahan nu wazè nu zepigi he minsan hentei. Ke edhusey ka kinahanglan he iyan nu peminega kes ebpekevenar.

<sup>22</sup>Kinahanglan he kenè nu zegdegusuwi is kepilì nu te ed-uwit te menge tumutuu su ke ebpekesalà sikandin iyan ka egkevesulan. Ne kinahanglan he wazà igkevesuli kenikew he iring kayi.

<sup>23</sup>Ne elin daan sambag ku kenikew is: kenè nu iyan dà inuma is wahig, kekenà, inum ka zaan te zeisey he vinu su wey mevewii is getek nu wey is mezakel he zaru nu.

<sup>24</sup>Duen menge etew he kenè en ebpekeeles is menge mezaat he vaal zan ne netueanan te langun te wazè pa sikandan imbistigaha. Ne zuen daan menge etew he nekeeles is menge mezaat he vaal zan ne wey zà heini egketueni ke ed-imbistigahan. <sup>25</sup>Ne iring din ded daan duen menge etew he kenà ebpekeeles is menge vaal zan he meupiya ne zuen daan menge etew he kenà egketueanan is menge vaal zan he meupiya, iyan, duen timpu he egketueanan ded daan heini.

**6** <sup>1</sup>Is menge suluguen he tumutuu, kinahanglan he isipa zan is menge egalen dan he zait he edtehuzen dan te minsan keenu he timpu. Su pinaagi kayi wazà ebpekezezaat te zengeg te Megbevayà wey



wazà ebpekesudì te kebpenurù dey. <sup>2</sup>Ke tumutuu ki Kristu is egalen, kinahanglan he kenà maawà is kedtahud kandin te suluguen din he tumutuu tenged te telesuled dan pinaagi ki Kristu. Kinahanglan he tuwas pa he meupiya is baal te suluguen din tenged te tumutuu wey minahal te Megbevayà sikan is egketevangen dan pinaagi te vaal zan. Iyan heini ipenurù nu wey ipesavut nu ziyà te minge tumutuu.

### Is Tarù he Ketudluanan wey is Tutuu he Ketigeyunan

<sup>3</sup>Ke zuen ebpenurù te selakew he tuluuwen ne kenè din edewaten is hustu he kebpenurù te Nengazen tew he si Kristu wey is tuluuwen mehitenged te kedtumana tew te egkesuatan te Megbevayà, <sup>4</sup>paglung sikandin he mepedeligen. Utew subra is kegkesuat din te minge winali he kebpekidlawan mehitenged te minge lalag dà. Kayi ebpuun is kegkesina, is kebpekid-eget, is kedsulà, is kedhaled he wazè din kepesikazan, <sup>5</sup>wey is kebpekidsemukà. Ulaula heini te minge etew he nelalung en is isip dan wey kenè dan en edewaten is tutuu he tuluuwen. Kunaan dan ke petigayun is kebpesakup te Megbevayà.

<sup>6</sup>Tutuu iyan he zekelà utew is pulus te kebpesakup te Megbevayà, iyan, dutun dà te etew he ibmeupiya en te gehinawa zin is minsan deisey he egketigeyunan din. <sup>7</sup>Su te ked-enaka kenita wazè ta uwiten, wazè ta zaan egkeuwit emun ebpatay ki. <sup>8</sup>Ke zuen ta egkekaan wey ke zuen ta igkebisti, meupiya en is gehinawa ta. <sup>9</sup>Is minge etew he egkesuat he medsepian, melemu sikandan egkepenulayi wey egkeseleizi. Mezakel is minge suat dan he wazà pulus ne ebpekezezaat heini. Ebpekezezaat heini kandan wey egkehimu zaan he ibpatay zan heini. <sup>10</sup>Su ke zuen etew he susuaten te selapi ne egkehimu he egkeulaula kandin is minsan hengkey he mezaat. Pinaagi kayi neiniyugan te zuma is tuluuwen tew ne tenged kayi nehimu he utew mezakel is minge keseengan dan.

### Is Minge Telaan ki Timoteo

<sup>11</sup>Ne sikew mulà, suluguen ka te Megbevayà; likayi nu is langun he iring kayi he minge ulaula. Hemeni nu is metazeng he ulaula, is kedtumana te egkesuatan te Megbevayà, is kedsarig kandin, is kegkegegawi nu te minge zuma nu, is kebmeinentusen te minge supak dan, wey is kelinew te ulaula nu. <sup>12</sup>Penigudu ka he meupiya is kedlumbè nu, *he ke và egkegiya, is kedtumana nu te langun he ebpeveelan kenikew tenged te neketuu ka. Hemeni nu is untung he wazè din pidtemanan su umba midhimu ka te Megbevayà he tumutuu kandin su wey nu heini maangken. Nekepenudtul ka ziyà te mezakel he minge etew he neketuu ka te tutuu he tuluuwen.*

<sup>13,14</sup>Ebpeketistigus is Megbevayà wey si Jesu Kristu he ebpeketelteleenan ku sikew he purungi nu tumana he wazà sayep is

insugù ku kenikew taman te kenè pa edlikù is Nengazen tew he si Jesu Kristu. Is Megbevayà, iyan ebpengelintau he meuyag is langun he minge linimbag din; ne si Jesus, iyan nekepenistigus mehitenged te tutuu he tuluuwen diyà te etuvangan ni Punsyu Pilatu. <sup>15</sup>Ibpeilikù si Jesus te Megbevayà ke egketuman en is hustu he timpu. Iyan dà ebayàbayà te langun is Megbevayà. Iyan sikandin kes meupiya is kebpekesavuk din. Iyan sikandin ebayàbayà te minsan hentei he hadi wey zatù. <sup>16</sup>Iyan sikandin wazà kemetayen. Diyà sikandin ed-ubpà te kerayag he kenà egkeuvayan. Wazà etew he nekeahà kandin ne kenà sikandin egkeahà te minsan hentei he etew. Berakat he zeliga sikandin wey medhadì sikandin te wazà pidtamanan.

<sup>17</sup>Is minge tumutuu he mezakel is minge azen dan, kegiyi nu he kenè dan mebpelavew wey kenè dan medsarig te minge azen dan su kenè ta egketuanan ke keenu ki egkeewai te minge azen ta. Kegiysi nu he iyan dan serigi is Megbevayà su iyan sikandin metulanged. Is minsan hengkey he naazen ta, imbegey zin kenita wey mebmeupiya is kebpekesavuk ta. <sup>18</sup>Kegiysi nu is minge sepian he tumutuu he hemeni zan ul-ulaha is meupiya su iyan heini hustu he ketigeyunan. Mebmetulanged dan wey mebmetinevangan. <sup>19</sup>Pinaagi kayi egkekuwa zan is hustu he ketigeyunan he kenè dan egkesuwey keuzemà. Ne ebpekeangken dan te untung he iyan tutuu he untung.

<sup>20</sup>Sikew Timoteo, purungi nu tumana is tuluuwen he insarig kenikew. Likayi nu is minge etew he supak te Megbevayà is kegkagikagi zan. Likayi nu zaan is kunaan te zuma ke tutuu en he ketau. <sup>21</sup>Duen дума he minge etew he nekekuwa en kun kayi te ketau, iyan, pinaagi kayi neengkezan dan en is tutuu he tuluuwen he midtuuwan tew.

Berakat he ikegagew kew is langun te Megbevayà.